



Broj: 02-05-19381-3/14
Sarajevo, 19.06.2014. godine

Na osnovu člana 22. i 24. stav 4. Zakona o Vladi Kantona Sarajevo ("Službene novine Kantona Sarajevo", broj: 24/03 - Prečišćeni tekst i 38/13), Vlada Kantona Sarajevo, na **71.** sjednici održanoj **19.06.2014.** godine, donijela je sljedeći

ZAKLJUČAK

1. Utvrđuje se Prijedlog zakona o izmjenama i dopunama Zakona o dopunskim pravima boraca-branitelja Bosne i Hercegovine.
2. Predlaže se Skupštini Kantona Sarajevo da pretrese Prijedlog zakona iz tačke 1. ovog zaključka i da ga, u skladu sa članom 158. Poslovnika Skupštine Kantona Sarajevo ("Službene novine Kantona Sarajevo", broj 41/12-Drugi novi prečišćeni tekst, 15/13 i 47/13), usvoji po skraćenom postupku.

VRŠILAC FUNKCIJE
PREMIJER
Muhamed Kozadra dipl.ecc.

Dostaviti:

1. Predsjedavajuća Skupštine Kantona Sarajevo
2. Skupština Kantona Sarajevo
3. Premijer Kantona Sarajevo
4. Ministarstvo za boračka pitanja
6. Evidencija
7. **A r h i v a**



web: <http://vlada.ks.gov.ba>
e-mail: vlada@vlada.ks.gov.ba
Tel: + 387 (0) 33 562-068, 562-070
Fax: + 387 (0) 33 562-211
Sarajevo, Reisa Džemaludina Čauševića 1



Na osnovu člana 18. stav 1. tačka b) u vezi sa čl. 12., 13. i 14. Ustava Kantona Sarajevo („Službene novine Kantona Sarajevo“, br. 1/96, 2/96-Ispravka, 3/96-Ispravka, 16/97, 14/00, 4/01, 28/04 i 6/13) i čl. 7. i 30. Zakona o pravima branilaca i članova njihovih porodica („Službene novine Federacije BiH“, br. 33/04, 56/05-Ispravka, 70/07 i 9/10) Skupština Kantona Sarajevo, na sjednici održanoj dana _____ 2014. godine, donijela je

PRIJEDLOG

ZAKON

O IZMJENAMA I DOPUNAMA ZAKONA O DOPUNSKIM PRAVIMA BORACA-BRANITELJA BOSNE I HERCEGOVINE

Član 1.

U Zakonu o dopunskim pravima boraca-branitelja Bosne i Hercegovine („Službene novine Kantona Sarajevo“, 45/12-Prečišćeni tekst), iza člana 55. dodaje se novi član 55a. koji glasi:

„ 55a.

• „Pravo na mjesečna novčana primanja imaju djeca ratnih vojnih invalida sa utvrđenim invaliditetom od 20 do 80% (u daljnjem tekstu: dječiji dodatak), bez obzira na imovinski cenzus i ukoliko ovo pravo ne ostvaruje po propisima o zaštiti porodice sa djecom.

• Dječiji dodatak isplaćuje se djeci do završetka redovnog školovanja, a najkasnije do navršenih 27.godina života. Dječiji dodatak isplaćuje se i za vrijeme dok je dijete usljed bolesti ili liječenja spriječeno da izvršava svoje obaveze u školi, odnosno fakultetu, a najkasnije do navršenih 27 godina života.

• Osnovica za utvrđivanje visine dječijeg dodatka je prosječna neto plaća ostvarena u Kantonu u prethodnoj godini.

• Visinu iznosa dječijeg dodatka utvrđuje Ministarstvo svake budžetske godine u skladu sa raspoloživim budžetskim sredstavima, s tim da taj iznos ne može biti manji od 4,8% od osnovice iz stava (3) ovog člana.“

Član 2.

U članu 67. stav (1) iza broja 55. dodaje se novi broj “ 55a.“

Član 3.

Iza člana 75. dodaje se novi član 75a. i glasi:

„75a.

Općinske službe donose rješenje o priznavanju prava iz člana 55a. ovog Zakona, a pravo teče od dana podnošenja zahtjeva“

Član 4.

Ovaj Zakon stupa na snagu osmog dana od dana objavljivanja u „Službenim novinama Kantona Sarajevo“.

Predsjedavajuća
Skupštine Kantona Sarajevo
Prof.dr. Mirjana Malić

OBRAZLOŽENJE

I – PRAVNI OSNOV

Pravni osnov za donošenje Zakona o izmjenama i dopunama Zakona o dopunskim pravima boraca-branitelja Bosne i Hercegovine sadržan je u odredbama člana 18. stav 1. tačka b) u vezi sa čl. 12, 13. i 14. Ustava Kantona Sarajevo («Službene novine Kantona Sarajevo», br. 1/96, 2/96-Ispravka, 3/96-Ispravka, 16/97, 14/00, 4/01 i 28/04), te odredbama čl. 7. i 30. Zakona o pravima branilaca i članova njihovih porodica («Službene novine Federacije Bosne i Hercegovine», br. 33/04, 56/05-Ispravka, 70/07 i 9/10).

II – RAZLOZI ZA DONOŠENJE

U Zakonu o dopunskim pravima boraca – branitelja Bosne i Hercegovine („Službene novine Kantona Sarajevo“, broj 45/12-Prečišćeni tekst) dodaje se nova vrsta prava na mjesečna novčana primanja koja imaju djeca ratnih vojnih invalida sa utvrđenim invaliditetom od 20 do 80%. Razlog za uvođenje ovog novog prava jeste što je Zakon o socijalnoj zaštiti, zaštiti civilnih žrtava rata i zaštiti porodica sa djecom („Službene novine Kantona Sarajevo“ br. 16/02, 8/03, 2/06, 21/06, 17/10, 26/12, 15/13 i 18/14) u okviru svojih izmjena i dopuna iz prava na dječiji dodatak izostavio sve osobe sa invaliditetom uključujući i ratne vojne invalide od 20 do 80% koji su prema ranije važećem propisu ostvarivali pravo na ovaj dodatak bez obzira na imovinski cenzus. Ovaj dodatak je bio uvećan za 50% u odnosu na dječiji dodatak koji ostvaruju porodice i djeca gdje je predviđen cenzus (iznos 33 KM). Razmatrajući ovo evidentno ukidanje prava iz oblasti dječije zaštite Ministarstvo je iniciralo izmjene i dopune važećeg Zakona o dopunskim pravima boraca-branitelja Bosne i Hercegovine kako bi ove kategorije ponovo uveli u ostvarivanje prava na dječiji dodatak, ali na način da se ovo pravo ostvaruje u oblasti boračko invalidske zaštite. Obzirom da je u izmjenama i dopunama Zakona o socijalnoj zaštiti, zaštiti civilnih žrtava rata i zaštiti porodice sa djecom ostavljen rok općinskim službama da u trajanju od 60 dana od dana stupanja na snagu ovog Zakona provedu postupak usklađivanja donešenih rješenja po pravu na dječiji dodatak, što znači da će većina naših korisnika ostati bez mogućnosti daljeg ostvarivanja prava na dječiji dodatak, predlažemo da se ovaj Prijedlog izmjena i dopuna Zakona o dopunskim pravima boraca-branitelja Bosne i Hercegovine usvoji po skraćenom postupku.

III – USKLAĐENOST SA LEGISLATIVOM EVROPSKE UNIJE

Ministarstvo pravde i uprave Kantona Sarajevo izjasnilo se da tekst Prijedloga ovog zakona nije u suprotnosti sa Evropskom konvencijom o zaštiti ljudskih prava i osnovnih sloboda i drugim pravnim aktima kojima je utvrđena zaštita ljudskih prava i sloboda.

IV – OBJAŠNJENJE PRAVNIH RJEŠENJA SADRŽANIH U ZAKONU

U članu 1. propisuje se pravo na mjesečna novčana primanja djeci ratnih vojnih invalida sa utvrđenim invaliditetom od 20 do 80% u vidu dječijeg dodatka koji bi se ostvarivao bez obzira na imovinski cenzus. Ovaj dodatak isplaćuje se djeci do završetka redovnog školovanja a najkasnije do navršene 27 godine života. Kao osnovica za utvrđivanje visine dječijeg dodatka propisana je prosječna neto plaća ostvarena u Kantonu Sarajevo u prethodnoj godini, a istu utvrđuje Ministarstvo svake budžetske godine spram raspoloživih budžetskih sredstava. Utvrđeno je da dječiji dodatak ne može biti manji od 4,8% od osnovice (49,39 KM). Ovo se odnosi samo na one korisnike koji ovo pravo ne ostvaruju putem Ministarstva za rad, socijalnu politiku, raseljena lica i izbjeglice.

U članu 2. propisuje se da u priznanju ovog prava rješenje donosi opštinski načelnik. U drugostepenom upravnom postupku o ovom pravu rješava Ministarstvo.

U členu 3. koji se odnosi na prelazne i završne odredbe utvrđuje se da će opštinske službe za BIZ od stupanja na snagu ovog Zakona donositi rješenja o priznavanju prava na dječiji dodatak, a da će pravo teći od dana podnošenja zahtjeva.

Članom 4. određuje se datum stupanja na snagu ovog Zakona.

FINANSIJSKA SREDSTVA

Za provođenje ovog Zakona neophodno je obezbjediti finansijska sredstva iz Budžeta Kantona Sarajevo. Prema informacijama koje su nam proslijeđene od Ministarstva za rad, socijalnu politiku, raseljena lica i izbjeglice Kantona Sarajeva ukupan broj djece invalida koji ostvaruje pravo na dječiji dodatak je 11.000. Obzirom da nismo bili u mogućnosti dobiti egzaktno broj djece ratnih vojnih invalida 20 do 80% koja su ostvarivala pravo na dječiji dodatak iz naprijed navedenog ukupnog broja, podatke o tome smo zatražili od Udruženja "Savez ratnih vojnih invalida" Kantona Sarajevo. Nadnadno smo od Ministarstva za rad i socijalnu politiku dobili podatak da je riječ o cca 3.300 korisnika dječijeg dodatka. Potrebna sredstva na godišnjem nivou za ostvarivanje prava na dječiji dodatak po ovom Zakonu bi bila: cca 3.300 x 49,39 x 12 što iznosi ukupno cca 1.952.280,00 KM. Navedeni cjelokupni godišnji iznos za ostvarivanje ovog prava do kraja 2014. godine neće biti neophodan obzirom da se početak ostvarivanja i isplata ovog prava, uzimajući u obzir period stupanja na snagu Zakona, te rok od najmanje 60 dana u kojem su općinske službe za BIZ dužne donijeti rješenja o ostvarivanju istog po podnošenju zahtjeva, sredstva će biti neophodna za šest mjeseci. U razgovorima sa Ministarstvom za rad, socijalnu politiku, raseljena lica i izbjeglice oni su voljni staviti na raspolaganje potrebna sredstva za ove namjene našem Ministarstvu prenošenjem istih procedurom preraspodjele ili rebalansa Budžeta KS za 2014. godinu.